

欽定大清會典事例

欽定大清會典事例卷一百七十五

戶部

田賦 究追虧空

究追虧空○順治九年題准錢糧徵解支放各有款項若為公務移緩就急謂之挪移假公濟私謂之侵盜軍興公用不得已而借用謂之透支藉端開銷謂之冒破令撫按清查追抵○康熙九年覆准胥役經收管解令連名互結如有侵盜令互結者同賠若經管官不行取結亦令賠補○又題准侵挪錢糧家產盡絕遇

赦免追。即行題結。妻子免交刑部。○十年題准承追  
侵挪錢糧。初次限四月追完。逾限不完。降俸二  
級。戴罪督催。再限一年全完。如仍不完。罰俸一  
年。○十一年覆准州縣侵挪錢糧。司道府官。本  
年及次年查出者。免議。如遲至三四年始行查  
出者。仍照失察例議處。○又題准承追侵挪錢  
糧。初限展至一年。○又題准州縣官將已徵錢  
糧。作為民欠。恣意挪用者。革職提問。司道府官  
隱匿不報者。革職。如已申報而督撫不題叅者。  
降五級調用。○又議准州縣官侵盜錢糧。上司

不即查出。或據詳代為開銷者。司道府降職一級調用。督撫罰俸一年。若前任州縣等官侵盜。後任官不行查出。或代為開銷者。降職一級調用。前任官挪移。後任官不行查出者。罰俸一年。布政使。抑勒州縣衛所官。故挪錢糧者。照挪用正項例處分。督撫不題參。照徇隱例議處。其州縣侵挪。司道府官查出者免議。○又題准。官員承追侵挪錢糧。如有家產果盡。不據實詳請豁免。以致各犯父子夫妻分離者。承追官罰俸一年。巡撫罰俸六月。○又題准。

赦前侵欺錢糧各官。不交吏部議處者。將該部司官  
罰俸三月。堂官罰俸兩月。○又題准。凡侵盜錢  
糧人犯。捏報逃亡。並不起解者。州縣官降職一  
級調用。該管上司罰俸一年。起解遲誤者。州縣  
官罰俸一年。該管上司罰俸六月。○又題准。州  
縣官將衙役侵盜捏為民欠。知府遽為轉報者。  
罰俸六月。○十六年題准。侵盜錢糧。應發解人  
犯。未經部題入官之前全完。或已題未發解之  
先全完者。並免入官。○十七年題准。各省有因  
軍需動用錢糧。刻不容緩者。司道官申詳督撫。

一面咨題。一面動用。若司道並未申詳。擅自動用。督撫先未題咨。徑為請銷者。督撫降職二級。司道官降職五級。皆調用。若司道申詳。督撫不咨題。擅令動用者。司道官免議。督撫降職五級。調用。皆不准開銷。責令賠還。○十八年議准。州縣官將已徵錢糧挪用。詐稱民欠。司道府官隱匿不報者。皆革職提問。督撫徇縱不叅者。革職。○又題准。凡該管上司逼勒下屬挪移庫銀。本官自首。審實免議。上司照貪官例治罪。如逼勒至死者。許家屬赴督撫具告。督撫不准理許。赴

通政使司鼓廳具告。審實將通勒者抵罪。不准理者革職。○二十七年題准。藩庫交代錢糧。如有侵盜虧空等弊。將隱匿不叅之該督撫革職。如督撫有侵盜入己之處。照侵欺例。從重治罪。○又議准。州縣虧空。知府不揭報。反逼新任官出結者革職。○三十九年

諭。近見各省督撫等。先以官員虧空倉庫銀米題叅。後以家產盡絕保題者甚多。此等虧空銀米。作何著落。追還。著九卿詹事科道會議具奏。欽此。遵

旨議定。嗣後倉庫銀米。如有虧空。審明是侵是挪。著落

虧空官追還。有實係家產盡絕不能完結者。著落歲終申報保題之各上司官名下追完。至起解銀兩及漕糧等項已經起程之後。如有虧空者。將解官運官審明追還。實係家產盡絕不能完納者。亦著落差遣不慎之該管上司名下追完。如有藉端私派於民者。從重治罪。○四十年覆准。凡虧空之案。專責藩司。咨部文到日。嚴督府州縣各官。務遵四月定限。將侵挪審明招解。如逾限。將州縣官揭參遲延。限後又滿四月。再參遲延。將本管知府。皆照易結不結例議處。藩



司於限內不據實揭報。後以遲延揭報塞責者。亦照易結不結例處分。至各州縣修理城池等項。雖係私捐。仍令通報。如虧空事發。各該撫藩司。將私捐修理之項。審作挪移正項者。承審官照徇縱例議處。○又覆准各省倉庫收存帑銀米穀。如私行動用。督撫題參革職提問。審出侵盜挪用。分別治罪。○四十四年覆准。凡知府盤查出結之後。州縣一有虧空。知府無論幾時查出。揭參免其從重治罪。○四十五年題准。旗員虧空。該旗保題家產盡絕。將虧空之員入辛者。

庫並嗣後查出家產隱匿等弊。將保題之都統副都統議處。均攤賠補。○又覆准州縣錢糧節年挪新補舊。或借貸掩飾。知府盤查時。確有實數。無由覺察。及事發據實揭報。將虧空之州縣治罪。其節年盤查之知府免議。○四十七年議准。虧空官有從前任所私蓄。被親友借取。有圖書文約可據者。題明查追。抵補欠項。○四十八年議准。虧空帑銀。審係徵收制錢。往外易銀。未回。虧空倉穀。審係泥爛。或借給里民。均不作侵挪。果能參後限內全完。准其開復。○五十年議

准虧空官。如有現任居官之子。情願代父賠還者。即於其子任所按限扣追完日免罪。○五十年議准。旗員虧空錢糧。該督撫查明家口。備造清冊解部。交與該旗查追。儻承問官有嚇索任所資財。及聽該犯官隱匿。或將奴僕放出為民等情。將承問官並造冊等官治罪。至該犯官歸旗。如有偷賣房地屯莊隱匿財產等情。將該管官治罪。○又議准。州縣虧空錢糧。知府止將本年揭報。其積年虧空。直至題參之後始報查出者。仍將通同隱匿之知府。照例題參。○五十

六年覆准。嗣後虧空案內。如果係民欠。捏報全完。或私借倉糧。捏報無欠。除私借之員。照律治罪。其捏報官。照虛出通關硃鈔律。計所出之銀數。併贓以監守自盜論。其實在民欠。著落原借之人完納。其挪移有抵。即令接任官催徵。若捏報私借之項。該員情願一年內代民全完。准其開復。○五十九年議准。州縣虧空錢糧。知府從前果有扶同徇隱情弊。別經發覺者。將知府叅革。其虧空錢糧。令知府獨賠。○又覆准。州縣官恃有上司分賠之例。將庫銀藏匿。假捏虧空者。

審實者落本犯名下獨追還項。仍照例治罪。○  
又覆准。凡州縣虧空。如知府查出揭報。司道。司  
道不即轉揭。及司道已經轉揭。督撫不即題叅。  
許知府竟揭部院。將不轉不叅之督撫。司道議  
處。著令分賠。○又議准。嗣後州縣官虧空錢糧。  
儻知府揭報。而布政使司不即轉揭。或已揭。而  
督撫不即題叅者。許揭報官徑報部院。將徇庇  
之上司。照例議處。仍令分賠。其衛所等官虧空  
屯衛等項錢糧。照虧空地丁例議處。○又覆准。  
各省虧空錢糧。皆因夤緣餽送禮物所致。發覺

之日。與受皆革職。嚴飭督撫照例實心奉行。其  
有上司逼勒交盤以致虧空者。許新任官據實  
直揭部院科道衙門題參。審明將逼勒各官照  
例議處。具揭之新官。令其赴部調補別省。○又  
覆准。嗣後督撫不盡心防範於未虧空之前。竭  
力補苴於虧空發覺之後。將督撫照例議處。仍  
令分賠完補。○六十一年十二月

諭。自古惟正之供。所以儲軍國之需。當治平無事之日。  
必使倉庫充足。斯可有備無患。

皇考躬行節儉。裕國愛民。六十餘年以來。蠲租賜復。殆

無虛日。休養生息之恩至矣。而近日各省道府州縣。虧空錢糧者正復不少。揆厥所由。或由上司勒索。或係本人侵漁。豈皆因公挪用。

皇考好生如天。不忍即正典刑。故此輩每恃寬容。毫無畏懼。恣意虧空。動輒盈千累萬。督撫明知其弊。曲相容隱。及至萬難掩飾之時。又往往改侵盜為挪移。勒限追補。視為故事。究竟全完者絕少。新任之人。上司逼受前任交代。初畏大吏之勢。雖有虧空。不得不受。繼啟效尤之心。任意侵蝕。更藉此挾制上司。不得不為之隱諱。輾轉相因。以致庫藏全虛。一旦地方或有

急需不能支應。關係匪淺。本應即時徹底清查。重加懲治。但念已成積習。姑從寬典。除陝西省外。限以三年。各省督撫嚴查所屬錢糧。凡有虧空。無論已叅未叅。均於三年之內。如數補足。毋得苛派民間。毋得藉端遮飾。如限滿不完。定從重治罪。若三年完補之後。再有虧空。除被上司勒索及因公挪移者。分別處治外。其實在侵欺入己者。確審具奏。即行正法。儻仍徇私容隱。或經朕訪實。或被科道糾叅。將督撫一併從重治罪。即如山東藩庫。虧空至數十萬。雖以俸工補足。其實不能不取之民間。額外加派山東如此。他省



可知。以小民之膏血。為官司之補苴。地方安得不困乎。既虧國帑。復累民生。大負

皇考愛養元元之至意。此朕斷斷不能姑容者。至於署印之官。尤須慎重簡擇。諺云。署印如行劫。

皇考每言及此。未嘗不恨。署印之人。始而百計鑽營。既而視如傳舍。肆意貪婪。圖飽慾壑。或取媚上官。供其索取。貽害小民。尤非淺鮮。其於前任虧空。視作泛常。接受交盤。復轉授新任。苟且因循。虧空愈甚。嗣後如查出此等情弊。必將委署之上司。與署印之員。一併加倍治罪。決不姑貸。○雍正元年

諭將虧空錢糧各官革職留任催追必致貽累百姓既  
然獲罪革職豈可留任嗣後虧空錢糧各官即行革  
職著落伊身勒限追還○又

諭嗣後凡委官署印應遴選賢能如署印官虧空錢糧  
著落遴委之督撫布政使分賠有將虧空錢糧勒逼  
接任官收受情由著接任官開列情由徑報部科即  
據實奏聞○又覆准有司內私挪帑項為己捐升並  
為子弟納職致有虧欠者督撫覈參照侵盜例  
治罪其子弟所捐職銜革去該管上司不加詳  
查通同徇隱勒逼接任官收受者或被科道糾

叅或被受害之人首告。將該管上司。無論現任離任。嚴加議處。其虧欠帑銀著令分賠。○又議准直省督撫於州縣開徵之始。令知府遴選賢員。與該管官同封銀櫃。每十日二十日。別委賢員當衆拆封。立即起解。其存儲倉穀按季盤查。出結轉報。如有徇隱情弊。將知府並委員即行題叅。照徇庇例議處。再題叅虧空官時。即於任所嚴追。並行文原籍地方。將家產人口逐一嚴察造冊存案。如任所不能完。行文原籍變價補足。如原籍地方官不行查出。或被旁人首告。或

被科道糾參亦照徇庇例議處。○又議准各省從前虧空其有著落銀內如有人亡產絕者該督撫即照無著銀所定年限補完報部仍令該督撫於每歲終將前項有著無著銀完過若干之處逐一分析造冊具題如照從前怠玩不盡心催追每年完不足數者即將各該督撫並司道等官交與吏部從重議處。○又覆准虧空官員查其子有出任者解任發追完日仍補原官。○二年

諭朕惟錢糧固屬緊要而民情尤宜體恤聞有州縣官

虧空。百姓情願代賠者。此端斷不可開。虧空官未必愛民。百姓貧富不等。斷無閩縣情願代賠之事。或係蠹吏土豪勾連。藉端科斂。或不肖紳衿。平時出入衙門。通同作弊。及本官被叅。猶冀復任。因而號召多事之人。連名具呈閩縣願賠。後官畏懼處分。接呈入手。即差役按里追呼。名為樂輸。實係強派。其為民累不淺。嗣後紳衿情願幫完者。聽其自行完納。其有閩縣具呈者。即將為首之人從重治罪。知府州縣擅准督撫查叅議處。至因公挪移之項。依限全完。定例准其開復。督撫題明全完。即給咨本官。令其隨本引見。驗

看可用者即用。如不可用。以原品休致。其年老及不願補之人。亦於本內聲明。不必來京。○又議准。嗣後布政使司虧空。無論侵挪。皆按侵盜之律治罪。果能一年內全完。減等發落。如一年內不能通完。即將本犯正法。仍變家產追賠。若督撫通同徇隱。別經發覺。將督撫革職。仍令分賠。或有督撫勒索。以致虧空。許布政使於未叅虧空之前。開具實迹。徑報通政使司轉奏。將督撫照貪婪例交該部從重治罪。其或布政使自有虧空。恐督撫盤查。先行誣報者。審明時。將布政使從重

治罪○又

諭凡官員虧空錢糧倉穀該管上司失於盤查自應革職分賠。但定例虧空官員審無侵盜入己之項。勒限一年內賠補全完。准以原職補用。而失察革職之上司。反不得與本官同開復。似屬可憫。嗣後虧空銀穀限內全完。例應開復者。該督撫覈明原叅失察之上司。一併題請開復。○三年覆准。凡州縣虧空錢糧。於疏內聲明。將該管上司應否分賠之處。查明一併具題。若不聲明具題。督撫照徇庇例議處。○又議准。州縣虧空。審明確係知府徇隱。應令獨

賠之項。將知府革職離任。本犯擬罪監追。即按本犯任所財物。及原籍家產。勒限一年變賣賠補。無論本犯完補。或知府協同完補。如能於限內全完。係侵盜之項。本犯擬死罪者。照例減二等發落。擬軍流徒杖者。照例釋免。係挪移之項。至二萬兩以上者。本犯照例釋免。未至二萬兩者。本犯及徇庇之知府。悉准其開復。如一年限內。無論侵盜挪移。本人家產不能完補。即將本人照現在未完之數。治罪發落。其未完帑銀。照數著落徇隱之知府。勒限一年完補。若能於限



內全完者。准其開復。如不完。再限一年完補。若能於二限內全完者。照原職降一級調用。如二限內完不足數者。再限一年完補。若能於三限內全完者。照原職降二級調用。如三限內不完。即將知府家產抵補。雖賠補全完。亦不准其開復。如遇分賠之項。亦先在本犯名下。勒限一年追補全完。將本犯分別侵挪。照例發落開復。如限內本人止完一半。例得開復者。仍照例俟知府全完之日。皆准開復。如本犯限內全無完補。及不足一半。仍照例將本人監追。照依原虧之

數令知府分賠一半。勒限一年全完。准其開復。如不完。再限一年。能於二限內全完。准其開復。於補官日罰俸一年。如二限內完不足數。再限一年。能於三限內全完。照依原職降一級調用。若三限不完。及本犯名下應追未完者。皆不准開復。未完之銀。仍著落分賠。○四年

諭各省虧空。動稱無著之項。夫錢糧未經徵收。則欠在民。既經徵收。而有虧空。則欠在官。州縣官不能完。則上司有分賠之例。本人雖已病故。而子孫有應追之條。何得藉口無著。以虛國帑。此皆督撫等瞻徇情面。

不肯大破積習所致。蓋自存不肖之心。以己身現為督撫。恐將來亦被牽累。故目前豫留地步也。從前彌補虧空。皆捐俸工銀抵補。及朕有旨不許捐輸俸工。今則皆稱以耗羨抵補。夫耗羨亦出於民。乃不問當日督撫等所以致此虧空之由。而動稱耗羨彌補。以百姓之脂膏。飽有司之谿壑。豈朕憫惜元元之至意乎。今特沛寬恩。凡各省虧空未經補完者。再限三年。寬至雍正七年。務須一一清楚。如屆期再不全完。定將督撫從重治罪。如有實在不能依限之處。著督撫奏聞請旨。○又覆准。凡州縣挪移虧空。審明係知府

不揭報應著落分賠之項。將知府革職。其虧空銀米。仍依挪移虧空年限。先於本犯名下儘數著落嚴追。一年限內全完。將本犯及不揭報之知府。皆照例准其開復。二限三限補完。本犯照例分別發落。若三年限滿。不能完足。本犯仍照原議治罪。果係家產全無。無力完帑。將未完銀米等項。著落不揭報之知府分賠一半。其餘一半。入於無著項下完結。其知府分賠一半銀。勒限一年完補。限內全完。准其開復。不完。再限一年完補。能於二限內全完。准其開復。於補官日

罰俸一年。如二限內完不足數。再限一年完補。能於三限內全完。照原職降一級調用。如三次限滿不完。不准開復。未完銀兩。仍著落追賠。○  
五年

諭向來內外文武官虧空甚多。我

聖祖仁皇帝深知其弊。屢降諭旨。諄諄戒飭。止以

聖心仁慈寬大。冀其悛改。不忍加誅。乃此輩不知感戴。反至肆行無忌。日積月累。虧空之數愈多。朕即位以來。念此虧空之項。關係國帑。豈能以國家一定經費。任貪官汙吏之侵漁。且聞貪婪之員。平日侵蝕國帑。

而被叅之後。則將所有貲財藏匿。或送歸鄉里。或分寄宗族親黨之家。及接任官查出虧空。則故作貧窶之狀。希冀遷延數年。援家產盡絕之例。以圖豁免。是以被叅虧空之員。令按查其官囊家產。並及其寄放之處。蓋不欲使貪汙之輩。盜國帑剝民膏。以飽囊橐也。此輩本有應死之罪。但朕念弊端已久。相習成風。若遽然按律治罪。則誅戮者衆。幾於不教而殺。此心有所不忍。故令完補虧空。全其性命。此朕仁育義正用中之大道。原欲暫行二三年。使天下咸聞朕諭。共知朕心。若再有犯者。則按法律治罪。今已曉諭四年。

不得謂之不教而殺矣。上年已令九卿酌定條例。嗣後有侵盜虧空之官。則按所定之例治罪。有應正法者。即照例正法。其梭查官囊家產。及於寄放宗族親黨之處。應不必行矣。諭下之日。即著停止。此輩若知朕化導保全之恩。盡洗從前侵剋之弊。實伊等之福。亦朕之所深望。若仍執迷不悟。顧貨財而不恤身命。亦其自取。不足憫惻。著遵諭行。○又

諭各省屬官虧空。而上司明知故縱者。令徇隱之上司。各賠一分。永為定例。○七年覆准。凡有虧空。劾參之後。一面於任所嚴追。一面移咨該旗籍。查其房

地產業。毋得仍聽本家子弟奴僕居住收租。令該管官照額徵租。收存公處。歲底造冊報部查覈。俟該督撫咨覆到日。如該員欠項不完。或完不足數者。即將房地產業及所收之租一併抵補。如各該員欠項已完。即將入官房產及收過租銀照數給還本家。至家產抵補虧空之數。尚有多餘者。仍給還本人。○八年覆准。嗣後應追侵盜挪移各案。除不及千兩者。仍照原限勒追外。其千兩以上。萬兩以下者。再定限一年。二萬兩以下者。再定限二年。每年應完一半。三萬兩



以上者。再定限三年。每年應完三分之一。如能依定限內通完者。承追州縣。每案紀錄一次。督催知府。每三案紀錄一次。道員。每五案紀錄一次。督撫。布政使。按察使。每十案紀錄一次。若逾限不完。或未通完者。將承追之州縣。每案罰俸一年。督催知府。每案罰俸六月。司道督撫。每案罰俸三月。將千兩以上。萬兩以下款內。下欠之銀。再限一年。戴罪督催。其二萬兩以下。初限一年款內。下欠之銀。歸入第二年項下。統再限一年。戴罪催完。至三萬兩以上。初限一年款內。下

欠之銀即歸入第二年數內。一併戴罪催完。若仍未通完。將承追之州縣降一級留任。督催之知府罰俸一年。司道督撫各罰俸六月。將一千兩以上萬兩以下之款。並二萬兩以下款內應追之銀。再限一年戴罪催完。其三萬兩以上之款。兩年限內尚未通完者。將下欠之銀歸入第三年數內。一併戴罪催完。儻各能照數通完。將承追州縣所降之級。准其開復。若不能通完。將承追州縣照所降之級調用。督催知府降一級留任。司道督撫各罰俸一年。其接任承追督催

等官。仍照依到任之日扣限。如果正犯家產已盡。正身已故。及並無的屬子孫。不能賠補者。該地方官查明確實。取具印甘文結申府。加結轉詳。保題豁免。僅題後欠帑人員。別有田產貨財。房屋人口寄頓發覺者。盡籍入官。將出結州縣革職。督催知府降二級調用。司道降一級留任。督撫罰俸一年。其所欠銀米等項。著落出結各官賠補。○十三年題准八旗辦理虧空案件。仍照例將房屋田地人口變價還項。其墳園房屋人口祭田。一概不得入官。其從前已經入官者。

亦請

旨敕令該旗逐一清查給還。○又

諭凡州縣錢糧之虧空。總不出侵盜挪移二項。當其侵挪之時。官因主之。而經手之經承。自無不知也。乃不及稟隨。且從而慫恿。以便作姦分肥。迨至本官監追。而經承且優游於事外。本官問重罪。而經承僅得不行稟阻之處分。故凡虧空累累。多由於官吏之相成也。朕意以為經承庫吏。經營倉庫之人。亦宜重其處分之例。更定以勸懲之法。凡州縣官到任。則先揀選殷實老成吏胥二人。以充錢糧總吏。通詳報部。凡徵

改錢糧。卽今隨繳報解。不得存留內署。承辦五年。該  
縣無虧空者。卽將總吏咨部。以九品雜職卽用。本官  
少有虧空。總吏力行舉阻。如不聽從。徑赴院司呈明  
免罪。若該吏不行舉阻。致本官以虧空糾叅。卽將經  
承一同監追。減本官一等治罪。如此則經承有所責  
成。迫於勸懲。不敢順從。本官擅動國帑。亦杜絕虧空  
之一法。其如何詳細定例之處。著九卿會議具奏。議定

例見刑律 ○乾隆元年

諭戶刑二部奏請遵奉恩詔豁免欠帑人員內。查其原  
案有應追繳者。有不應追繳者。朕思不應追繳之案。

與其赦免於事後。何如詳審於事前。使人無挖累。而  
事易辦理。即如開欠一節。原係借貸交接之私情。遇  
本人或有虧空及應追之項。自當聽其自行索討。以  
清公帑。今乃令將平日欠銀之人開出。即按開出之  
人著令完繳。是以私債而成公項。從前辦理殊未妥  
協。其他分賠代賠著賠名色甚多。如道府有稽查州  
縣之責。州縣設有虧空。道府非屬分肥。即係疏縱。責  
令分賠。實屬允當。若因錢糧數多。一人未能歸結。而  
令旁人分賠代賠著賠。則本屬牽連。而日久難完。又  
不得不為開豁。於國帑仍無裨益。其應如何分別定

例。俾事不滋擾而法在必行。著戶刑二部妥議具奏。  
欽此遵

旨議定。各旗省挖欠各案錢糧。除漕運鹽銅追賠各有  
成例。並虧空倉庫錢糧。監臨主守各官。以及收  
支辦解。並侵貪挪移保題家產盡絕後。有隱匿  
發覺。一切獨賠分賠代賠著賠。載在定例。畫一  
遵行外。其分賠案內。如果米穀收存不慎。官物  
遺失不全。自應揭報題叅著追。若既經接受出  
結。即與前任無涉。乃藉端分派前任各官賠還。  
殊累無辜。嗣後遇有徽變米穀短少官物。著落

接受出結之員。按數賠補。及徇庇之上司分賠。不得藉端攤派。又分賠案內。如支銷錢糧。原有  
一定款項額數。若違例開銷。理應著落擅動。濫  
給之人照數賠補。乃竟有私自動用。並不報部。  
及至日後奏銷時。始行奏報開除。及查出與定  
例不符。駁令追賠。因為數多。一人不能歸結。或  
著屬官公捐。或令接任分賠。徒滋擾累。嗣後如  
有濫行動用。例不准銷等項。仍著落擅動之人  
賠補。不得抑勒分派。又代賠案內。如挖欠錢糧。  
原止應著落本身的屬。及定例內應行分賠者。



賠之人。乃承辦之員。因欠帑者。獨力難賠。或產盡無著。因而輾轉株連。如分居別產之弟兄親屬。並不知情之親友主僕旁人。於公帑實未侵漁。私財又非寄頓。勒令賠補。尤為拖累。應行禁止。毋得株連。又代賠案內。如承估承變承追。原有一定例限。其遲延不力。各有應得處分。如查估之員。勘報不實。及承變承追。以多報少。瞻徇延緩。帑項懸缺者。著令賠償。若查勘本無不實。催追本無徇縱。止因變抵不敷。與夫公項無完。遽令代賠。殊有未協。嗣後查估追變之員。該管

上司查明果無情弊。仍在本人名下歸結。不得勒令代賠。又著賠案內。如地方荒歉。借給貧民米穀。或開墾借給牛具籽糧。及借給吏役兵丁辦公帑銀。原係題明咨部。行令出借。按限扣追。如經手捏報。自應著賠。若遇人亡產絕。無可扣追。概令賠補。實屬屈抑。嗣後凡有奉文出借之項。除捏飾侵漁。未經報明。私行借動。即行治罪。著賠外。如係奉文借給。實無可追。即確查出結。照例歸於無著。案內題豁。又承追各項贓罰銀。定例著落本犯嚴追。如果家產盡絕。例應保題。

豁免。乃本犯無完。贓項無着。輒將親族株連。控累。更有遠年無據贓私。其人已故。無可質訊。即著子孫追補。殊覺失平。嗣後依律著落本犯勒追完結。其有律應身死勿徵者。亦照例免徵。至遠年贓私。必查有實據。方可著追。概不得於本犯之外。濫追賠補。○又議准。虧空人員。經管錢糧。所屬有借支借領。與夫同官挪借。出有印領者。均係虧空帑項。該員既以虧空題叅治罪。借欠之項。自應分別議處追還。至其平日債負。或幫助親友。以及同官私借。雖有文約。並無印領。

者。無論遠年近年。有無確據。總係借貸交接私情。並非有虧於公帑。應聽其自行索討。不准抵追。○十二年

諭。向來督撫徇庇屬員。有虧空倉穀。並不留心稽查。據實題參。及至該員身故。無可彌補。始行揭報。不得已上下通同。倒提年月。以掩飾從前不能稽查之故。雍正五年間。屬官虧空。有上司賠補分賠之例。是以稽查嚴密。官員知所畏懼。虧空之案甚少。近來此例不行。所以貪風復熾。不可不加以整頓。稽查屬官。乃督撫專責。果其實心詳查。耳目何患不周。果其查出即

叅屬官何至不知畏懼。敢於任意虧空。乃平日因循寬假。明知虧空。冀其自行彌補。及至水落石出。僅以題叅了事。本任既無可著追。旗籍又聲明豁免。相習成風。無可底止。將來虧空之業。由此日增。於吏治深為有害。嗣後虧空官未完銀米。著巡撫以下分賠。○

又

諭州縣官侵蝕倉庫。非因公挪用可比。此等貪劣之員。多有身故事發。以後不過於家屬名下勒限著追。遷延一二年。率以家產全無保題豁免。且並有父歿而子乘機盜帑。移罪於父。已仍得坐擁厚貲者。故無以

做貪風。夫父子一身也。子代父罪。亦理之宜。嗣後侵  
貪之案。如該員身故。審明實係侵盜庫帑者。即將其  
子監追。著為例。○又覆准。嗣後州縣虧空。經該管道  
府查出揭參。各免其失察處分。如例應責成盤  
查保結之屬員。俟其離任身故。始參實係從前  
盤查不實。直至事已敗露。始行覈參。希圖卸責。  
無論其揭報與否。將該管道府以失察附參。雖  
無徇隱情弊。仍照失察州縣虧空例。分別議處。  
○十四年題准。嗣後除失察知府。直隸州。虧空  
之道員等官。照失察例。降四級調用外。至失察

州縣虧空。既責成盤查不實之知府。其該管道員。不豫行揭叅州縣虧空者。即定為降一級留任。○十五年

諭。向來州縣虧空。本犯無力完帑。將徇隱之革職知府。勒限賠補。至限滿不能全完。例止革職。別無治罪之條。夫以已經革職之員。復議革職。不過照例註冊。虛文從事耳。此等劣員。在任時既已通同徇隱。代賠時又可任意延挨。帑項虛懸。刑章倖免。凡稽查之不嚴。代賠之不力。未必非此例有以啟之也。部臣託之空言。而朕亦明知託之空言而允之。上下相蒙。成何政

體朕一惟務實。不尚虛文。侵貪之弊。尤不可不亟為整飭。嗣後侵貪案內。應代賠之知府。限滿不完。作何分別治罪之處。該部另行定議具奏。議定例。見刑律。○二十

八年議准。官員虧欠帑項。將田房什物入官變抵。估價一千兩以內者。於半年限內變交。至數千兩以上。一時不能即售者。該督撫酌量一年。或分作兩年完解。所變各項。以估價定准之日。起限變賣。限內遇有封印日期。不准扣除。○三十年

諭。工程覈減之。必須嚴追治罪者。原以承辦工程人員。



或草率誤工。或任意浮冒。即以侵欺為覈減。是較之顯然侵欺者。不大徑庭。而玩延不完。自有應得之罪。若因已無可追。即行豁免。不復加之罪譴。則倖免之徒。轉自以為得計。至於覈減內採買水腳等項。今昔時價不同。經部覈駁後。該督撫有將實在情形奏聞者。朕特加寬免。此與浮冒工程者判然不同。即經費項下長支溢領。誤發各款情節。亦非一律。若不論事理之重輕。概行議罪。並且累及子孫。則竟漫無區別。嗣後應如何酌定章程。使巧侵者不致漏網。獲罪者知所創懲。無辜者免於拖累。著戶部刑部詳細定議。

具奏欽此遵

旨議定。凡遇工程覈減除浮冒侵欺。仍按本律定議外。如實係覈減銀兩。本身現在無力完繳。銀數在一千兩以上者。照知府分賠屬員侵欺不完之例治罪。如數不及千兩者。仍照舊例豁免。至如採買水脚等項覈減銀兩。如果力不能完。照例請豁。其餘經費項下長支溢領誤發各項。以及分賠之非由屬員侵欺。並代賠著賠之失於詳查。與格於常例而不准開銷等款。為數不及千兩者。查實後亦准免罪題豁。如數在千兩以上

者題豁時或將本員照工程覈減無完治罪之  
例減一等問擬或免其治罪之處於題豁疏內  
聲明情節請

旨定奪○三十八年

諭官員經辦軍需銀款理應覈實報銷。如果有冒報浮  
銷糜帑飽橐者。豈惟著落追賠。並當按律治罪。若僅  
辦理不善。及經部照例覈減。該員並無侵冒情弊。如  
離任後力不能完。自應於該管上司名下分攤賠繳。  
設係承辦急需要務。一時猝辦應差。而購買物價不  
能悉符常例。致干部駁勒賠。是該員意在急公。與濫

費者有聞。又應查明酌量寬免。以歸允當。其應如何  
分析查辦之處。著各該部詳細定議具奏。欽此。遵

旨議定。軍需案內應追銀兩。如果有冒報浮銷等弊。嚴  
追完項。照律治罪。如查無虛糜飽橐情由。不過  
辦理不善。經部照例覈減者。於承辦本員名下  
全數著追。如原辦官離任後力難獨完。而將來  
仍可補官扣俸者。將原追銀兩著落本員。及該  
管上司各半分賠。至若原官於定數分賠後。續  
經罷職。所欠之項力不能完者。將本員應賠一  
半銀兩。照例題豁。其餘一半銀兩著落該管上

司攤賠。如查係本員應行獨賠之案。例不分攤。實係產盡無著者。仍查照向例辦理。其有承辦急需要務。不能悉符常例。致有追賠者。查覈明確。將實在情節。專摺具奏。○四十七年奏准。令各督撫。府尹鹽政。各將所屬倉庫。嚴行徹底清查。實無虧缺者。取結具奏。若查出虧空侵漁等事。即行據實嚴參。該督撫等不得有意迴護。如有因公挪移未歸款項。查明確實。即勒限籌補。經此次清查後。再有虧缺。或別經發覺。除本員照例治罪賠補外。將盤查出結之督撫等官。交

部從重議處。並將虧缺錢糧按數分賠一半。以示懲儆。○四十九年

諭。從來緣事獲罪之人。兄弟本不相及。如一人獲罪。將兄弟資產概行查抄。辦理未免過當。若以未經分析。盡免入官。則應行查封者。皆得託詞財產未分。任意隱匿。使貪吏子孫仍復坐擁厚資。亦復何以示儆。嗣後緣事獲罪。應行查抄。而兄弟未經分產者。著將所有產業。按其兄弟人數分股計算。如家產值銀十萬。兄弟五人。每人應得二萬。止將本犯名下應得一股入官。其餘兄弟名下應得者。概行給予。以昭平允。著

為令。○五十七年議准。凡州縣徵收錢糧。該管道府將完欠細數覈實詳查。儻查有短少。即行揭報。嚴叅治罪。如該管道府有意通同徇隱。該督撫即一併叅辦。至督撫藩司稍存瞻顧。別經查出虧空。除照例治罪外。仍著落督撫藩司道府各官。按照分賠。○又議准。倉存穀石。於春借秋還之時。責令各道府覈實稽查。如有捏稱民欠。蒙混弊竇。該督撫藩司道府徇隱瞻顧者。其議處分賠亦照經徵錢糧例辦理。○嘉慶八年議准承追一切銀兩。數在一萬兩以內者。仍限五年

完交外。其數在一萬兩以外者。准於五年之限。酌加一年。數在二萬兩以外者。再加一年。由此遞加。則銀至五萬兩以外者。得限十年。至十萬兩者。得限十五年。以次遞加。銀數與限期多寡相準。至銀數在十餘萬兩以外者。另行酌加年限之處。臨時聲敘情節。奏明請

旨定奪。○十九年

諭著通諭各直省督撫等。嗣後州縣官交代。務嚴飭前後任及監盤之員。按限結算。毋得遲逾。前任一有虧缺。即令後任據實揭報。叅處。若前任所虧。後任已經



查出並未揭報。監盤官亦扶同徇隱。出結之後。別經查出。即將後任及監盤官。嚴行叅辦。並將虧短各款。著落分賠。以示懲儆。○道光二年

諭顏檢奏查明部撥司庫閒款銀五十一萬五千七百餘兩。經歷任前司因公借支未歸銀四十七萬六千二百餘兩。現在實存銀三萬九千四百餘兩。其鹽勦加價生息等項銀兩。除因公動用外。多有借支。以待歸補。是以並未報銷。仍於奏銷冊內虛列銀款。並無現銀實存在庫等語。覽奏實堪駭異。州縣官因公挪移庫項。尚有應得罪名。乃直隸歷任督藩。私行借支。

庫項並未報銷。非虧空而何。從前總督藩司皆存官  
官相護之見。並不認真究辦。置國帑於不問。儻遇地  
方事在急需。迫不及待。竟至無可支應。則所關甚大。  
如云司庫並無虧挪情弊。其誰信之。汝係朕棄瑕錄  
用之人。自應黽勉報效。不得藉詞差務紛繁。為日後  
卸過地步。著即督飭藩司查明此項銀兩。究係因何  
動支借用。起自何人。始自何年。逐一嚴行查辦。據實  
叅奏。仍將借動款項。按任分別著賠。立限追繳歸款。  
以實庫儲。毋使稍有含混。致干重咎。○咸豐二年

諭。李德奏虧空未結各案。擬將延不詳揭之上司。一併

叅處等語。州縣徵存錢糧。絲毫皆關國帑。豈容任意延宕。以致庫款虛懸。山東省已叅未結各案。自道光二十八年。至今共有十一起之多。該員等既已虧缺於前。仍復玩延於後。一遇事故。即查抄抵補。亦屬具文。據該撫奏稱。現飭藩司嚴定期限。督同該管道府州。勒令將應交之項。如數解繳。儻繳不足數。該管上司仍不實力催追。除將虧空之員。立即嚴叅外。並將該道府州咨部。從重議處。必應如此辦理。各省奏叅虧空之案甚多。其能愧奮完解者。實屬寥寥。總由該管上司不肯認真督催所致。著各督撫等嚴飭所屬。

將虧空各案趕緊催繳。如仍延宕。即將該管上司一併附參懲處。○十一年

諭譚廷襄奏。滙陳山東省虧空積弊。請嚴行查覈。分別勒限清釐一摺。山東省吏治廢弛。往往藉口災緩。諉卸催科不力處分。並可影射侵漁。其軍需墊款。則以已徵到官之錢糧。挪移墊辦。捏造報銷。強行列抵。經年累月。不能結算。據該撫查明咸豐七年以前交代。應行追賠虧款。至七十一萬有奇。其七年以後積壓二百數十起。其中挪墊虧空。更復不少。及委員監算盤查。惟以開報初。參了事。玩泄侵蝕。庫儲日虧。積習

相沿。殊堪痛恨。著譚廷襄督飭藩司。先將通省軍需  
挪抵各款。立限趕緊清釐。再將交代逐案句稽。自七  
年以後。截至本年十月初一日以前。作為舊案。飭局  
統行調算。勒限四箇月。一律清結。儻有前任狡執延  
宕。後任故意留難。立即從嚴叅辦。除抵下欠之項。全  
數提追。如有不完。查抄治罪。所有累年交代遲延各  
員。應得處分。著俟此次清釐以後。再行分別辦理。其  
本年十月初一日以後新案。通限以四箇月為斷。其  
有兩任交代及倉穀較多者。照例推展。如屆期不結。  
即分別撤任勒追。扣補停委。以示懲儆。其軍需墊款。

概不准以正項錢糧扣抵。儻敢徵存不解。無論銀數多寡。立予創懲。並將該管道府一併叅處。至各直省州縣。積弊相沿。鮮不藉蠲緩錢糧。墊辦軍需。為蒙混侵吞地步。山東一省如此。他省可知。著各直省督撫遵照此旨。一體勒限清釐。各州縣交代。務使完欠分明。不准稍有蒙混。如有愿任交代清楚者。准其破格保獎。其平日剝削官項。現復阻撓挾制。以冀搪抵者。一經查出。奏請加等治罪。其軍需墊用各款。尤宜飭令覈實開報。不准牽混。以重庫儲。○同治四年

諭閩敬銘奏覈明山東省舊案交代第二案虧缺各員

請旨革職查抄監追一摺。山東省咸豐十一年。原參  
刪減軍需不敷列抵之九十六員。經閻敬銘歸入舊  
案交代第二案。督同藩司局員。逐案句稽。除前任章  
邱縣知縣屠繼烈等。業已撥解清楚外。其餘各員。多  
未完繳。統計實在短欠正雜倉款。至四十七萬六千  
餘兩之多。該員等當時既將未經覈定軍需。於交代  
案內籠統列抵。迨至刪減不敷。按款催追。又不趕緊  
清完。並有續虧之項。實屬大干功令。所有單開虧欠  
正雜各款之知縣方沛霖等四十七員。著一併查抄  
監追。限滿不完。照例分別銀數多寡。按律定擬治罪。

其業經病故者。查明有無子孫出仕。著落完繳。並咨各該省督撫。將各參員原籍家產。一併查抄。咨覆山東備抵。其單開欠解賠捐各款。及僅欠捐款各員。雖例不計罪。惟各該員等所欠。至四十餘萬兩之多。亦屬不合。著閻敬銘分別催追。毋任延宕。○五年

諭。趙長齡奏請嚴懲州縣虧空等語。近來山西各州縣。因虧空後查抄。既不認真監追。賃住民房。以致在任時任意奢侈。挪用公項。盈千累萬。罔知顧忌。亟應申明成例。以示懲儆。此等惡習。恐不獨山西一省為然。即著照趙長齡所請。嗣後遇有交代虧空。逾限未交。



者。一面由司密詳請奏。一面即由該督撫密行查封。毋任隱匿寄頓。其例應監追各員。並著各該督撫派員看視進監。不得仍沿舊習。庶各該州縣知所做惕。共勉操持。以重庫款而飭吏治。○光緒十年奏准。凡係州縣應行解司之項。統由前任官趕緊埽數。解司。即交卸之日。尾款趕解不及。移交後任。後任官於接印之日。即應登時批解。以期各清各任。概不准率報存庫。亦毋庸再按從前初次限滿。勒限兩箇月。提解藩庫辦理。致滋弊端。查後任官轉行造冊。原有四十日例限。如冊內仍有

開報徵存未解。其責專在結報之後任官。應由該藩司詳請將接收之員。照起解錢糧設法延挨。顯有虧挪情弊例。革職提省。查明是侵是挪。從嚴參辦。該管上司及監盤官。不行查參。均照徇庇例。奏參。

欽定大清會典事例卷一百七十六

戶部

田賦 追賠拖欠

追賠拖欠。○雍正二年議准。凡追賠各項拖欠。帑銀。以一年為一限。計其應追之數。分為三限。令其完償。其有不限交完者。現任官初限不完。解任。令同二限銀戴罪完納。如二限內將初限二限之數全完。以原官補用。如僅完初限二限未能全完。仍戴罪追比。若初限二限並不完納。將職銜革去。同三限銀一併嚴追。此三限內

能將三年分數全完者。仍開復補用。能完二年分數者。復其職銜。戴罪完納。能完一年分數者。仍革職嚴追。儻三限均不能完。交刑部治罪。所欠帑銀。於家屬名下嚴追。無官人等。初限不完。監禁。仍同二限銀併追。如二限內將初限二限之數全完。暫予釋放。如僅完初限。二限不能全完。仍監禁追比。若初限二限並不能完。令該旗該地方官將家產封守。仍同三限銀一併嚴追。此三限內能將三年分數全完。本身釋放免罪。家產給還。能完兩年分數者。將本身釋放。家產

仍封守在官。能完一年分數者。暫免其變產治罪。儻三限均不能完。即將財產籍沒變賣抵償。本身交刑部治罪。其分年多者。總以三限已未完之數。遞等定其處分。如三限均不能完。則不待限滿。即行治罪。或年限已滿。計算未完帑銀。在一二限之內。仍照一二限之例處分。均再限一年完納。如一年不能全完。亦即治罪。至追比之項。有分二年者。一年不完。照初限例處分。二年均不完。即照三限例治罪。儻二年內完一年之數。再限一年。仍不能完。或完不足數。亦即治

罪。○乾隆元年議准。外任大小官。凡遇降革留任。及降職降俸住俸等項。務於吏部議明具題。後將降革住俸之銀。照數分別扣解。按季造冊報部。○三年議准。嗣後雜職微員。除貪贓枉法革職。任內有降罰案件。照例仍追編俸外。如實係因公誣誤。無論降罰案件多寡。所有食過編俸。概行免追。○二十三年議准。各省現任官員。應追一切數減分賠等銀。凡數在五百兩以下。計任內所得養廉。全行坐扣。不必聽其自完。如有不敷。即於下年養廉內照數補扣。如數在一

百兩以下者於養廉內全行扣清。○又議准嗣後離任官員應追銀兩行令任所督撫查明並無隱寄。取具州縣官切實印結。移咨本旗本籍。再行詳細確查。如果無財產寄頓。即由本旗本籍加結保題豁免。儻豁免後復經任所查出欺隱情弊者。將任所出結官革職。原豁銀兩著落分賠。○二十五年奏准大宛二縣承追案件通行直隸省及該員流寓寄籍地方逐一查察。如果通查並無家產。由直隸布政使覈明詳請順天府主稿會同直隸總督題豁。○二十八年議

准嗣後承追事件。計算例限。不准扣除封印日期。○三十一年議准。嗣後一切承追銀兩。數在十兩以上者。仍行文著追。數在十兩以內者。即令承辦之地方官。於額設公費銀內。代為完繳銷案。○三十二年議准。因公欠項。如係微末之員。委無產業。將現任俸工養廉。按年儘數坐扣完結。如本係有方完繳。借坐扣之名。延宕不完者。一經查出。將本人及承追之員。一體嚴參。○三十一年議准。各省承追案件。該督撫一面督屬嚴追。一面即行咨該員。歷過任所。嚴查有無。



隱寄毋庸俟本籍無追始行咨查任所。其中有  
產盡無追。必須移查任所各省。始得完結者。亦  
照此辦理。至承追有著款項。任所地方。自文到  
日起。勒限三箇月。查明取結申詳。該督撫咨明  
原籍追辦。如有逾違。照

欽部事件遲延例議處。至欠帑人員離任後。或託故  
逗遛。所在地方官。勒限三箇月。押令回籍著追。  
○又議准。官員欠項。有前案未經繳完。續有別  
項追賠。果係力難併納者。於前案完繳之後。再  
將續賠銀兩。按數定限。接追完納。○又奏准。州

縣衛所等官承追正雜錢糧未完議處除自行催徵全完者仍照例開復外其承追銀兩如係分賠代賠奉

旨恩免者皆非本員追完可比原議之案按其參限應得處分減等議處完結○四十年議准離任官員應追各項銀兩其有部減不符及任所派賠不公事情令其由本籍呈明詳咨任所覈辦不得自行赴任清理若地方官混為詳請者照贍徇例議處至任所督撫查覈案情有實係款項紛繁必須經手之員親身質對將緣由聲敘

移咨原籍飭令該員前往清理一俟清理完竣即勒令回籍如有藉端他往即行據實叅辦○又奏准旗員追賠銀兩數在一千兩以下者仍照舊例辦理其數在千兩以上及數逾萬兩至三四萬者均令按所定四年五年之限陸續完繳毋庸拘定每年應完若干如正限已滿仍未清完者部中查明已未完各數據實叅奏其或為數過多本人素無資財及查無隱匿寄頓者令承追衙門及該旗查明結報戶部按其情節覈實具奏應否展限之處請

旨定奪。○四十一年議准承追一切欠項除欽奉諭旨。定有限期專案勒令完繳外。其餘各款均於文到日起限。如數在三百兩以下者。限半年。三百兩以上者。限一年。數在一千兩至五千兩者。定限四年。五千兩以上者。定限五年。如限滿不完。承追州縣以及督催之各上司。照例議處。○四十二年奏准旗員控欠官項。不係本身侵欺虧空。一時不能措繳者。准於本身及兄弟子姪俸餉扣還。仍覈應得俸餉計抵所欠之數。如一二年可扣清者。咨部請扣。若須三四年以上。該旗

確查實無家產。議定應展年限。奏請坐扣。其請扣日期。或在錢糧冊檔過部以後。或已在月餉開放之際。未及入扣者。即將此項銀兩。令該旗入於伊等下月所食錢糧內。分為六箇月補扣。○四十六年奏准。各省承追銀兩。向例按銀數多寡定限催繳。逾限不完。承追官送部議處。惟欠項人員。往往有此省行追。尚未滿限。本人或升調他省。或緣事回籍。其未完銀兩。即應移交彼省著追。所有應得處分。如議原追官員。在彼尚未屆限。若議接追官員。則又甫事行催。往往

彼此推諉。嗣後欠帑人員。於例限將屆者。無論升遷革任。令將此一限應完銀兩。按數完繳。始准離省。○五十一年

諭八旗兵丁。有應追伊祖父欠項。於餉銀內坐扣者。所得餉銀有限。扣至百十年不能清完。生計未免拮据。著確查分別豁免。○五十二年議准。軍營陣亡官員。應追欠項。如係採買數減等項。本身應賠者。概行咨部豁免。毋庸具題。若係分賠代賠之款。所欠銀兩。著落同案各上司名下。按數攤賠。○五十二年議准。官員應追欠項。如事非因公。案情

較重。查明該管上司。果有失察及知情等事。儘  
遇本員無力完繳。統著該上司名下分別攤賠。  
若該員著追之案。有兩款至三四款者。各覈本  
案情節。照例畫一辦理。○五十五年議准。旗員  
應追公項。令各旗嚴飭各該參佐領。據實確查。  
如係尚有資財。即令如數依限完繳。不得捏稱  
無力。指餉坐扣。如所查不實。於豁免之後。別經  
發覺。財產入官。仍將出結官革職。原豁銀兩。並  
著賠還。其應追分賠代賠數減銀兩。實在無力  
完繳。並無官職者。該參佐領出具切實印結。送

部照承追例。咨查該員歷過任所有無隱匿寄頓。取其任所各官印結送部。到日咨旗查照。俟年底由部彙題豁免。如該員子孫有隱漏不報者。一經查出。即將應追銀兩著落賠繳。並將蒙混出結之參佐領。嚴叅議處。若業已題豁之後。其子孫內續有得官之人。毋庸追溯重扣。再應賠各員。其同居子姪內有職官食俸之人。情願指俸代扣者。准其坐扣完項。其不願代扣者。亦聽其自便。○五十六年議准。追賠各項銀兩。按銀數分別年限。承追州縣。於文到日起限。接追



之員以到任日扣限。屆限不完。承追之州縣及督催之督撫司道府州。照例查叅。至數在五兩以上之案。以十分為率。承追五年限滿。能完至七分者。准其另照未完銀數。按年起限承追。

○五十九年

諭。內外各官員名下因公覈減借欠等項。及該員本係分賠代賠。經地方官查明結報家產盡絕。無力完繳者。並著照例題豁。毋庸再於同案各員名下攤追。用溥恩施。而昭體恤。

○嘉慶五年

諭。嗣後本身已故之員。應賠款項。除原有定限者。仍照

原限追繳外。其未經定限之款。俱著查照戶部承追定例。分別銀數多寡。按限著追。以清官項。○六年議准。承追銀兩。如其人實在家產全無。該管地方官不為據實詳請督撫題豁。將承追之州縣及督催之督撫。奏交吏部議處。旗員之該管官亦照此辦理。若該旗業已咨部而承辦司員任聽書役耽閣。不為彙題豁免。亦即將該司員奏交吏部議處。書役交刑部治罪。○七年奉

旨。賠繳官項。原以做侵挪而杜冒濫。乃近來外省辦理此等欠項。往往將本員應追之款。率擬攤賠及攤賠

無著。又復輾轉分攤。以致年深月久。帑項虛懸。而私肥囊橐之員。轉得置身事外。是於事理既不平允。而於國帑仍無實際。前經降旨。令各直省及八旗查明官員賠項。分別立限催繳。除俟限滿時。該部再行查明請旨外。至現行事例。其中有與原例不符之處。著該部逐一詳查。聲明纂輯。分別條款。酌議具奏。務使帑項不致虛懸。而辦理統歸畫一。欽此。遵。

旨議定。八旗各直省應完欠項人員。除侵挪虧空罪案。贓私及工程覈減等銀。統聽刑工二部勒限外。其戶屬項下追繳銀兩。欽奉。

諭旨定有限期者。專案勒令完繳。其餘採買腳價。解送運腳。驛站軍需。及豫發墊支。事竣覈減。追繳等項。遵照原定例限著追。如限滿不完。查係現任人員。或雖非現任。其原案係由該員一人貽誤。情節較重者。旗員由該都統。漢員由該督撫。各咨部查叅。按例辦理。若係離任及已故人員。欠項係屬因公覈減。情節較輕。其分賠攤賠代賠各款銀數。又多至五千兩以上。於限滿日已完至七分者。餘准其照未完銀數起限完繳。又同案分賠公項人員。各人名下。已將本身應賠

銀數繳完。如同賠之人有家產盡絕者。即將應賠銀數。照例豁免。不得復於同案各員名下重復攤派。並禁止在通省各官養廉內攤扣。更不得於承追省分著落賠補。違者照違

制律議處。又軍營陣亡人員。有應追分賠代賠等項銀兩。概行咨部豁免。又應繳欠項人員。或其人並無資財。或銀兩交不足數。呈繳田房產業抵項。而產業有兄弟未經分析者。令援照抄產之例。將產業按兄弟人數分股計算。止將該員名下一股呈出入官。其兄弟名下應得者。概令仍

舊管業。其兄弟不得任意隱匿。該管官亦不得一概波累。又官員承追督催一切因公覈減分攤代賠及軍需覈減等銀。仍照原例。均於文到日起限。統計銀數。作為十分。按年攤追。如每年屆限時。虛懸無完。承追官照例議處。如能遇限陸續完繳。承追官俟統限滿時。查明已未完分數。分別議處。其歷限未完處分。至統限滿時。仍能催追全完者。全行開復。承追銀兩數在五千兩以上。五年限滿能完至七分者。亦准予開復。又現任官員。應完銀兩為數不多者。准其在於

養廉內坐扣。並有詳請分限完交藩庫者。責令該管上司催追清結。如完解遲延。本員及該管上司分別議處。限滿不完。計未完分數。均照例叅處。仍令完納。又旗員欠項無完。有例應題豁之案。由該旗具結報部。統於年底彙案具題。咨旗銷案。各該旗不得竟不咨部。率行具奏。致與部案參差。違者。由部查叅。其兵丁坐扣餉銀。永行停止。又現任文武官員。其因公覈減。或分賠代賠。及子孫代祖父賠繳之類。凡在俸廉內坐扣者。俱止扣一半。一半留與當差。著為定例。○

又

諭向來外省辦理侵挪之案。定例綦嚴。原因該員等在任時肆意侵貪。是以將本員監追治罪。其未完之項。並著落伊子孫賠繳。至因公覈減及分賠代賠各項。或因限於時地與例不符。或係代人受過。此等賠項。究屬因公與侵挪入己者有間。此在立法之始。未嘗概無區別。嗣因奉行日久。辦理參差。畸重畸輕。轉不足以昭情理之平。蓋著賠之款。總以本身為重。其例應分賠者。即應於分攤之員分別覈辦。若不顧事理。率行攤派。或波及同僚。或累及上官。其或輟轉攤賠。



又於攤賠各員子孫名下著賠。是案外之官本身已代人賠累。子孫又復受追呼之苦。而本任應賠之員及其子孫早已置身事外。不獨事不公平。且帑項終歸無着。况分賠之項不得於他人名下攤派。及於同案各員重複攤追。並兄弟未經析產者。止准將本人名下應分財產入官。又八旗綠營兵丁坐扣餉銀。概行豁免。節經我

皇祖

皇考申諭詳明。仁至義盡。允宜永遠欽遵。即朕親政之初。亦早經明降諭旨。將分賠代賠分別減免。此內應

扣繳養廉之員。節次諭令每年僅交一半。於著追帑項之中。仍寓體恤下情之意。所有此次戶部擬修各條。俱著照議行。至兵丁餉銀原屬有限。若再行坐扣。伊等何以為生。著將一切扣餉之例。永行停止。其文武各官賠項。有應行扣繳廉俸者。此後每年止須坐扣一半。不必全行扣交。著為令。○又奏准入官田房什物。以承查官查出。或本員自行呈出之日起。限飭委員協同地方官。限三箇月內。調取契券會同勘估。如祖遺房產契券無存。即按時值估計結報。遲延查叅。至估報後。以接准部覆日。

起限銀數在千兩以內者限半年變繳千兩以  
上者該督撫酌看地方情形定限一年或分作  
二年完解先將酌定限期報部立案逾限不完  
者查叅其或變價不敷原估數目著落承變官  
賠繳不得仍於欠帑本員名下著追如有勘估  
不實以多報少侵虧帑項者將所虧之數著落  
承估承變官照數賠償仍嚴叅治罪○又奏准  
估計在京一切抵項變價房屋無論住房鋪面  
悉按標數分別等第作價扣抵如估價與契價  
相等及比契價較多者均准按估價抵交如所

估價值不敷契價。概不准其抵交。仍令自行變價。儘數交納。以清帑項。至查抄入官變價房屋。亦按標數分別等第覈實估計。仍比較契價之數。作價招變。以杜承變各員值多變少之弊。儻原價實在不能售變。並准該衙門隨時奏明。量為酌減價值招變。以免空閒坍塌。○十年議准各省文武離任候補人員。應追賠項銀兩。由各都統督撫查明該員旗籍任所。實無財產。力難完交。取結咨部。俟得缺之日扣交。如有隱匿不交。藉詞濫請補官得缺扣交者。一經發覺。將濫

請出結各官嚴行叅辦。至候補與現任人員。有派辦軍需者。應追覈減等銀。督撫隨時報部。准俟差竣扣交。○又議准官員欠項前後接扣之案。除前案銀兩尚未逾限者。俟前案清完再追後案。其前案逾限未完。除照例叅處外。仍將後案按限扣交。○道光九年

諭誠端等奏籌議追補虧缺各款一摺。前據誠端等奏。查出奉天府屬有積年因公動缺各款。請分別著追籌補。當經諭令將查出原虧各員。現官他省及已回旗籍。或經身故者。俱分別按限追繳。歷任接收各員。

及該管知府府尹等。查明在任月日。分別叅辦。茲據奏除飛咨原虧各員任所旗籍。並故員子孫名下。照例勒限一年追繳外。其接收出結各員。有代前任彌補各半者。有曾經詳請咨追者。該員等現俱有承辦營盤橋道差務。著加恩准其暫緩叅處。仍將咨追原虧各員完交不足之數。著落出結各員賠補。儻再不能完交。即著嚴叅究辦。所有原虧並歷任接收出結各員。及歷任兼管府尹。並府尹暨知府等。在任月日清單。俱著交戶部照例辦理。○咸豐元年議准甘肅省各屬倉庫虧數。分別彌補追賠。酌定章程七

條。一。清查冊報。以已徵未徵實虧倉庫。勒限著  
賠。加廉彌補。一。原請虧銀三千兩以下者。予限  
一年。三千兩以上者。二年。六千兩以上者。三年。  
一萬兩以上者。四年。一萬五千兩以上者。五年。  
二萬兩以上者。六年。三萬兩以上者。七年。其本  
員現任或已故。而子孫現任知縣以上者。照限  
追繳。並由戶部移咨吏部。停其升調。選補。儻逾  
限不完。監追查抄。令該上司。分成賠繳。至虧賠  
並追之員。應令兩案併計。數在四萬兩以上者。  
予限八年。每年各繳八分之一。一。州縣徵收錢

糧儘徵儘解紅簿串根即時調驗其按缺攤銷之項於通省文職養廉內分成酌扣。一官墊民欠銀糧草束按照現報冊內原墊各員勒限賠交民欠之項概予豁免如各員藉口帶徵以後仍有官墊民欠名目道府州縣一併叅處。一實虧各員或已故而子孫無官原管上司亦係家產盡絕應將道光十一年奏明攤扣一成養廉於咸豐八年攤銷完補之後接續扣補並每年酌提草價息銀一半以為通省攤捐之用。一甘肅平涼西甯三府所虧封存銀兩應將擅動各



員勒限三箇月如數追繳其升任他省並回籍  
病故者即由各省及原旗籍家屬嚴追儻限滿  
不能完足著落溢准借支道府賠繳一道府各  
庫提存所屬銀錢如係交存糧價即分別買補  
還倉並將日期咨部如係完繳正項應存司庫  
者即入冊候撥隨案造報俾有稽查。○同治三  
年

諭前因和潤德椿奏清查奉天各廳州縣倉庫虧短請  
將歷任現任各員分別革職勒追賠繳當經降旨照  
議辦理茲據寶珣德椿奏稱查明奉天各屬虧短銀

錢米石已各歸各任。截清覈算。請援照成案辦理等語。著照所請。所有奉天離任欠員。均著暫緩革職。仍分別虧短數目。勒限嚴追。自一千兩至五千兩者。限一年完繳。五千兩以上至一萬兩者。限二年完繳。一萬兩以上至二萬兩者。限三年完繳。二萬兩以上至四萬兩者。加展一半例限。一體按限嚴追歸款。儻限滿不完。即著革職監追。病故人員。著查明子孫家屬著追。其無著之款。即著落該管上司分賠八成。失察處分。著加恩寬免。其下短二成。著落最後出結之員賠繳。自此次定立章程以後。即須畫清界限。不准再

有挪移掩飾情弊。現任各員。遇有升調。覈算交代。務須認真盤查。毋許稍有含混。儻仍有前項情弊。即著從嚴叅辦。○光緒十二年奏准。直省州縣等官。欠解銀兩。如有叅後。續解全完。奏請開復之案。務將該員欠解何年何款若干。續解全完若干。入於何年季冊造報。詳細聲明。戶部即照數登記。仍令該督撫於送部撥冊內。註明收銀交庫月日。兩相覈對。如有舛錯遺漏。銀數不符。即照吏部奏定章程。將該員開復之案撤銷。並將詳報不實之該管上司。照例議處。

欽定大清會典事例卷一百七十七

戶部

田賦 奏銷 撥冊 奏報秋成 賦役全書

奏銷○順治三年定。官員造報各項文冊。遺漏重開數目舛錯。或多開少報。遺漏職名者。罰俸三月。該管官未經查出。據冊轉報者。罰俸一月。○九年覆准。直省銷算錢糧。逐款備造支解完欠清冊。送部查覈。○十二年覆准。州縣銷算錢糧。冊案不清。布政使司提究經承。不得擅提印官。離任曠職。○康熙六年覆准。直省錢糧。由部

查覈不必別設磨勘司。責成各司於奏銷時詳  
加磨勘。按年送御史刷卷。○七年題准。一應錢  
糧皆係地丁所出。凡催提徵解均稱地丁錢糧。  
除鹽課茶稅關稅蘆課並漕糧白糧各倉米穀  
等項考成。既與地丁錢糧有異。仍令照舊。其土  
司進貢物料折色本色物料雜稅當稅稅契牙  
稅牛驢稅贓罰折贖等項。非地丁所出。亦仍舊  
各款開列。至文武官師生空缺及扣罰俸銀。隨  
時追取學租支給餘贍解部。亦應照舊開造。其  
餘一應地丁錢糧。歲終奏銷時。該督撫將通省

錢糧若干。起運若干。存留若干。撥過兵餉若干。辦買顏料若干。餘贍若干。詳明造冊具報。不必開列款項。以便稽查。○又議准。有司奏銷遲延舛錯。以致遠限者。督撫題報時。將有司參處。督撫免議。如督撫行催不力。或屬員申報。不即具題者。並將督撫處分。○又題准。直省錢糧。每歲終。巡撫造奏銷冊一本。開列已完未完數目。送部。○十一年題准。奏銷冊。直省布政使司總數。府州縣細數。皆戴舊管新收。開除實在四柱。以憑稽覈。○十五年覆准。凡造報各項文移遲延。

者照

欽部事件違限例。分別月日議處。○二十二年題准。凡應行完結錢糧。故留疑竇。並不分析。混行造冊題報。以致款項不符者。府州縣衛所官。降職一級調用。轉報之司道等官。罰俸一年。督撫罰俸六月。若督撫查叅者免議。至經管錢糧各官。將徵收起存原額。及支銷總散數目。詳加覈算明白。該督撫等覆加磨算。如造冊內數目舛錯遺漏者。府州縣衛所官。罰俸一年。督撫及轉報之司道等官。各罰俸六月。如督撫司道等官。造

冊舛錯遺漏者。止將督撫等議處。又奏銷錢糧冊結。必須隨案送部。若司道府州縣衛所官。將冊結遲延不送。違限一月。罰俸半年。二月。罰俸九月。三月。罰俸一年。四五月。降職一級留任。六月以上。降二級調用。一年以上。革職。如司道等官已申送。而督撫不即送部。違限五月以下。照司道等官例處分。六月以上。降二級留任。一年以上。降三級調用。○二十八年議准。每年未清錢糧。後雖俟各項歸結。但不肖官不實心奉行。往往別生支節。故意耽延。不免舛錯遺漏遲延。



諸弊。令巡撫布政使司。每年冬杪。將現在未完各項事件。分析造具簡明清冊送部。以便稽查。此項冊籍。皆布政使司經營。令布政使司造送。如有假借造冊名色。致累各屬者。督撫題參議處。○六十一年十二月

諭

一應奏銷賦銀米穀物價工料。必詳查覈實開造清冊具奏。毋得虛開浮估。儻有以少作多。以賤作貴。數目不符。覈估不實者。事覺之日。將堂司官從重治罪。○雍正七年議准。地丁錢糧奏銷定例。直隸山東山西河南陝西。令四月到部。江蘇安徽江西

浙江湖廣令五月到部。福建四川廣東廣西雲南貴州令六月到部。務須遵照定例。依限奏銷。其有不能依限奏報者。題請展限。或實因州縣造冊遲延。具題參處者。除造冊遲延之州縣。照例議處。俟造送之州縣彙齊奏銷外。其具題之日。即將各該州縣已完未完數目。並造冊遲延之各該州縣已完未完數目。一同據實造冊。先行送部察議。○八年覆准。

盛京徵收稅課。及糶賣糧價。一面報解。

盛京戶部。一面註明年月。分析細數。造冊呈報稽

查御史查覈。如有交收數目不符。及監督等將應交之銀。遲延不交。管庫人員。將應收之銀。不即覈收。並刁難需索等弊。御史據實題參。如御史借稽查名色。刻意苛求滋擾者。由

盛京戶部據實題參。○又題准。山西大同朔平二府僻處邊隅。播種收成。氣候獨遲。必俟九月登場。方始開徵。催納。若一例於四月奏報。經徵僅止數月。各員徒受參罰。自雍正八年為始。於次年終別冊奏銷。○十年奏准。嗣後各省本年一應奏銷登答。務於次年十月內。按限清理。如

果頭緒繁多。實不能依限者。督撫題明。量子展限。僅有任意遲延。希圖牽混者。叅劾議處。○十一年題准。江南安徽巡撫。駐紮安慶。藩司駐紮江甯。與各省撫藩同城者不同。其奏銷既照各省之例。由藩司彙造送覈。自雍正十二年為始。量子展限。一應奏銷。定為六月題報。至各官分別考成。仍照定制扣限截數。不得稍有蒙混。○又覆准。江南江蘇所屬。奏銷帶徵錢糧。積有十五年之多。應加展兩月。至七月詳題。毋庸拘定五月限期。○十二年覆准。各省攢造奏銷冊籍。

於例限之前。令各屬先造草冊一本。申布政使司覈對無訛。發回照造。如款項舛錯。數目不符。即於草冊內分析指出。計程途遠近。定限發回。別繕補送。如果有案情繁雜。覈算不清。及怠玩屢催不應者。即提取造冊之經承查詢。不得濫提。以免各書吏跋涉守候之累。以杜司胥抑勒需索。如承總司胥。將各處造送草冊。混行發改。故意苛駁者。查出究治。如布政使司徇隱故縱。及提取多人在省覈造者。督撫即行題叅。○又奏准。各省奏銷現年錢糧。即將每年未完項下

續完若干。仍未完若干。並動用存儲各數目。令該省分別年限。彙造清冊。別繕題本。隨本年奏銷同題。該部按年查覈。別行繕本。隨本年奏銷一併題覆。其餘年限案內咨部者。統於年內分年確覈彙題。○又奏准。凡指駁款項。奏銷登答。照例概用咨文。若仍有未明。本部亦行咨駁。仍扣四箇月限期覈辦。俟一案全數登明。報部彙總題結。○乾隆元年題准。熱河完糧。以六月為麥秋。九月為大秋。分為兩限完報。至次年四月奏銷。限內不獲全完。即於奏銷冊內造明。扣滿

年限揭叅。○二十三年議准。各省錢糧奏銷。令藩司覈造總冊。申呈該督撫細加考覈。於司總冊上鈐蓋印信。聲明並無遺漏濫支字樣。繕本具題。其督撫總冊。停其造報。○又議准。布政使於奏銷冊內。將各屬批解月日。詳細開載。以便稽覈。○又議准。各省採辦顏料。原就土產所宜。若已停辦。折徵價銀。應將奏銷冊內臚列各項名色。概行刪除。至河南之宗祿。唐府瑞府匠班。陝西之秦府王駙馬勳田。直隸之膳人膳軍常。兌操賞等名。皆係明季流傳。凡有似此開載者。

一體刪除。統歸地丁條內造報。○二十七年題准。江甯藩司。與江蘇巡撫不在同城。嗣後奏銷冊籍。展限一月題報。○三十一年奉

旨。嗣後各省徵收錢糧。及一切奏銷支放等事。俱著以釐為斷。不必仍前開寫尾數。○三十七年奏准。嗣後各省地丁奏銷全案清楚。該督撫造冊咨部。於年底分省彙總具奏完結。毋庸逐案具題。○三十八年

諭。伊犁等處辦理銷算事件。不必仍行文總督衙門咨部。嗣後即由伊犁將軍衙門承辦。應行具奏者具奏。



應行送部者送部銷算。欽此。遵

旨議奏。除烏魯木齊開展巴里坤。均設有地方官。一切倉庫經費。錢糧供應等事。均係內地辦理。仍由總督衙門覈銷外。至伊犁塔爾巴哈台烏什庫車喀喇沙爾葉爾羌等處。每年經費錢糧等項。奏銷。由各該處駐紮大臣分摺具奏。造冊送部銷算。年底仍將奏撥經費銀數。咨會陝甘總督彙冊報部。○三十九年奏准。庫爾喀拉烏蘇及精河等處。係烏魯木齊所屬。其歲需錢糧造銷冊籍。仍統歸陝甘總督題銷。○又奏准。新疆各

處奏銷。以奏代題。造冊送部覈銷。免其揭送具題。○四十七年議准。烏魯木齊鎮迪道各屬。每年地丁錢糧。造具考成冊籍。由該道彙齊。合造總冊。呈齋都統查覈後。於次年三月咨送內地。專案題銷。○又議准。烏魯木齊鎮迪各屬。每年造報供支新疆倉穀奏銷細冊。由鎮迪道覈明。提造總冊。於次年四月內呈送內地。會辦題銷。○又議准。回疆各處。除吐魯番迪東。設有府廳州縣者。其錢糧奏銷。會同陝甘總督確查報銷外。至烏什葉爾羌喀什噶爾庫車喀喇沙爾等

處各項銀糧。嗣後由各該處大臣自行報銷。仍於奏銷時。一面咨部。一面將造銷數目。移咨陝甘總督隨時查察。如各處經管司員。有任意支領侵蝕者。將辦事大臣分別議處。○四十九年覆准。各省額徵耗銀。除江蘇省之漕項鹽課河湖灘租各案。奏銷限期不同。均隨正銀分案造報。其餘各款耗銀。彙同地丁耗羨。併為一冊。首列額徵。次列已未完災緩各數。隨同地丁奏銷。於次年五月底另疏題報。其雜稅耗羨。另造一冊。分案報部。至地漕等項耗羨。已未完各數。均

照正項之例。於次年四月底截數造報。雲南省於三月底造報。○五十六年議准。河東鹽課。歸入地丁攤徵。按年催徵通完。批解司庫報撥。其奏銷冊籍。由該管道府州覈定送司。仍留課銀名目。另款造冊。於每年四月題銷。○五十九年議准。各省動用錢糧報銷已未完結案件。令各督撫於每年十月內咨報。由部覈明。於次年彙案具題。○嘉慶三年覆准。西北兩路新疆地方。每年動用錢糧。欽奉

諭旨。停止具奏。咨部彙題。所有新疆各處大臣每年奏

銷均於次年四月。造具總散清冊。咨部會覈彙題。○又議准。浙江杭州滿營牧廠餘地。及塘外沿江漲復新沙。開墾地畝。種植木棉。徵收租錢。定限於次年五月內。專款造冊奏銷。○道光二十七年奏准。各直省奏銷錢糧。直隸。山東。山西。河南。陝西。甘肅。限次年四月。奉天。安徽。浙江。江西。湖北。湖南。江南之蘇州。藩司。限次年五月。福建。四川。廣東。廣西。雲南。貴州。江南之江甯。藩司。限次年六月。山西之大同。朔平。二府屬。於年底另冊奏銷。凡奏銷限期。該督撫照依例定月分。

於是月底具題。出文冊結隨本送部。若因公不能依限。奏明加展。無故逾限者議處。司道府州縣衛所官。先已違限。即令查明。據實開報吏部。分別照例議處。○咸豐二年

諭。戶部奏請飭催河南應豁節年民欠冊報一摺。咸豐

元年。降旨豁免各省節年民欠錢糧。各該省均經奏到。惟河南省至今尚未造報。屢經該部咨催。仍以調驗冊串為詞。任意稽延。且恐有以完作欠。希圖彌縫。隱混情弊。著署河南巡撫。即責成署藩司鄭敦謹。迅將奏銷冊報節年民欠各項錢糧。覆加確數。其應豁

不應豁之處。詳細釐剔。如有已徵未解之項。勒令按數提清。即於奏請豁免單內扣除。仍趕緊於年內開單具奏。毋許稍有含混。藉詞延宕。致滋弊端。○八年議准。各直省各營動用公費。每年收支存賸各數。限次年六月題銷。○同治六年奏准。州縣經徵旗租。全以冊報為憑。考成之優劣。視完欠之分數以為準。乃近年直隸省八項旗租。咸豐九年之奏銷。至同治二年始行題報。至咸豐十年十一年及同治元二三四等年奏銷。久逾例限。均未題報。難保無不肖州縣。擅行挪用。及以完

作欠情事。應令直隸總督。速將歷年未經奏銷各冊。趕緊題報。以嚴考覈。仍將造冊遲延之歷任藩司職名。查取咨送吏部議處。以儆玩泄。○光緒六年奏准。錢糧奏銷。各依定限。令各該督撫。一面具題。一面先將未完一分以上各員。開具簡明清單。專摺奏報。由部覈定處分。先行覆奏。其有奏後續完者。准其奏請歸本案開復。○又奏准。黔省應徵地糧耗羨。因防勦喫緊。未能依限辦理。自係實在情形。惟既據該撫奏明。按年徵有成數。即應造冊報銷。若統俟軍務告竣。



再行造報。官經數任。事隔多年。新舊虧挪。必致無從查覈。仍應分年造冊題報覈銷。毋任延宕。

○八年奏准。本年八月以後。各省報銷。或半年奏報一次。或一年奏報一次。上半年者。限本年十二月到部。下半年者。限次年六月到部。一年者。限次年八月到部。不准經年累月。彙案造報。

○十三年奏准。糧道匯一省之總。必須各州縣銜於數月前具詳。方能逐細稽覈。彙造轉詳。漕運總督衙門。辦八省之事。尤須各糧道於數月前詳到。方能次第覆覈。繕本具題。今已十二月

中旬分限詳題實已無及。應請暫准寬限一次。總於十三年八月內一律題報完竣。庶各省得以詳慎句稽。而戶部總覈一歲出入亦不致有遲誤。

撥冊○康熙三十一年題准直隸供應

陵寢及緊要事務所用者。該撫一面動用。一面報部。至別項錢糧。仍咨部動撥。違者照例議處。○三十四年覆准。嗣後現在應用錢糧。該撫一面動用。一面報部。若非現在即需錢糧。尚有時日者。仍咨部撥給。○三十七年覆准。直屬辦買豆草。供

應行糧及驛站工料車價官役俸工等項嗣後  
停其逐案咨部撥銀一面動用一面報部。○雍  
正二年議准春秋撥冊共三本奉文酌留封儲  
備用冊一本徵收各項舊管新收開除實在四  
柱冊一本分析應留應撥細數冊一本冬撥估  
餉冊共四本督撫提鎮標協官弁兵馬應支俸  
餉冊一本各項實在存庫銀冊一本額徵地丁  
民賦冊一本額徵雜稅冊一本春秋冬撥冊由  
部按冊覈對酌省分繁簡存留藩庫其春秋二  
季撥冊酌量撥銀解部以充京餉之用冬季撥

冊通計各省官俸兵餉總數。如本省銀數用者。按數撥給動用。其有不敷者。酌計附近贏餘省分。令該省運解協濟。定限四月解半。九月全解。如逾時未到者。覈叅。○四年覆准。行令直省。將已徵現存帑銀。悉造入季報冊內。將已奏銷未奏銷款項。分別開列報部。聽候撥解。儻不分別開造。或以未經奏銷。不造入季冊者。經部查出。題叅議處。○又覆准。直省督撫。及一應經管錢糧衙門。嗣後春秋二季報部冊內。務將一應存庫錢糧。並什物等項。照數報部。其庫存錢糧什

物或因原案未結。從前未經報部者。逐一查明。照數造入季報冊內。所有應變什物。先行變交。至未完事件。統於原案內歸結。○乾隆四十七年議准。烏魯木齊鎮迪道屬各官役。每歲應需養廉俸工銀兩。於先一年三月內。造具估冊。請咨內地。隨餉估撥。搭解迪化州。後改府庫存儲。於季底具文呈道。挂發支領。仍飭鎮迪道嚴加稽覈。其每年支過銀兩。由道彙總呈送都統覈明。移送內地。統隨新疆各項奏銷。專案題報。○嘉

慶十九年

論。戶部奏請飭催各省州縣徵存未解銀兩。開單呈覽。內江蘇安徽兩省。嘉慶十四年奏催案內未解銀三百餘萬兩。迄今數年。不特報解無幾。而徵存者轉益加多。現在此兩省共未解銀六百六十餘萬兩。山東省亦增至五十萬餘兩。其甘肅雲南直隸福建廣東等省。亦均有未解銀兩。實屬因循疲玩。直省各州縣經徵銀兩。乃國家惟正之供。度支經費所從出。若州縣徵存而不解司庫。以致部中指撥日形支絀。頻年積壓相仍。國用將於何取給。各督撫受朕厚恩。具有天良。無一實心辦事。思之實深憤懣。全不以國計為

念一任不肖官吏控延弊混。總不上緊清釐。明知經費未裕。瑣瑣焉議於常賦之外。設法巧取。而置分應提催之款於不辨。豈非本末倒置。公私罔辨乎。江蘇安徽二省。為數最多。張師誠甫經簡調。胡克家亦到任未久。無所用其迴護。山東省較之甘肅等省亦多至數倍。著嚴飭各該督撫。即督率該藩司認真查辦。各將徵存未解之款。儘數提解司庫。報部備撥。如州縣中有延不申解者。嚴參治罪。以儆其餘。儻提催不力。則惟該督撫藩司是問。恐不能當此重咎也。○道

光二年

諭各省庫貯銀兩。遇有動撥之款。均應隨時報部。俾有稽覈。前據顏檢奏。本年直隸省被災地方較多。請撥銀八十萬兩。以備賑需。經戶部議撥銀三十萬兩。其餘銀五十萬兩。議令於該省奏准鹽價生息。及實存木稅河道錢糧等項銀內撥用。復據該督奏。前項銀兩。除歷年動用借支外。通盤覈算。僅可湊撥銀十萬兩。不敷之項。仍請於附近省分動撥。茲據該部覈明。該省奏銷冊造。實存司庫閒款賑餘等項銀五十一萬餘兩。現無報部動用之案。儘可為賑項不敷之用。是該省既有庫貯銀兩。可以動撥。何以復請於鄰省。



撥解如已因公動用。即應報部覈銷。直隸如此。恐各省亦所不免。著通諭各督撫。嗣後務將庫貯銀兩覈實造報。有因公動用之款。即隨時報部立案。俾部中按冊撥用。有所稽考。儻冊造應存之項。迨經指撥。又稱因公動用。該部一經查明。即當嚴叅懲辦。以重庫款。而昭覈實。○又

諭戶部奏直隸省三次清查案内。屢經該部奏明。行追止據冊報完銀七十二萬九百餘兩。總未歸款報撥。查覈現冊內。有將原虧銀數以多造少。又聲明已入撥冊。覈對並未造入者。其咨報劃抵之款。未經劃抵。

前任完交銀兩。後任並未報解。至上年彙報續完銀十五萬兩。亦未隨案聲敘。又各省咨追限滿未完銀兩。全未嚴催。其已完納各省司庫者。亦不催令解完歸款。是該省有清查之名。無清查之實。續虧新虧。伊於胡底。著顏檢即將現冊所報之已完銀六十萬餘兩。查明有無挪移。據實奏明。其應行歸款報撥各項。迅速分別報部。毋任再有遲延。並將各冊內查照指出各情節。督同藩司逐款詳查咨覆。所有歷任辦理遲誤之藩司。即行查明在任月日。交部分別議處。○

三十年四月

諭各省造送春秋二季撥冊。每逾例限。向由戶部隨摺附參。嗣後著該部於每年二月八月到限之時。查明撥冊未到省分。專案奏參。以重帑項而肅功令。○咸

豐元年

諭各直省例應入撥銀兩。向由戶部登記備撥。自應趕緊造報。以憑撥用。乃經該部疊次奏催。而江甯江蘇安徽各藩司。延未造報之款。自道光三年起。至本年八月止。竟至一千五十九款。銀數至九百二十六萬餘兩之多。此中款項。即有應行釐剔之處。其實存在庫者。為數甚鉅。豈容任意玩延。致啟侵挪之漸。著兩

江總督。江蘇安徽各巡撫。嚴飭各該藩司。按照該部單開各款。將道光三年至二十三年未報各款。予限三年。二十三年至二十七年未報各款。予限一年。二十八年至本年八月未報各款。予限半年。迅即查清分款造報。如再玩延逾限。即著據實嚴參。○同治五年

諭。戶部奏申明定章。請飭遵辦一摺。向來各省徵存各庫暨報銷餘贖交代實存。並一切覈減還借扣完應繳等款。自道光三年嚴定章程。均應按季列冊報部覈銷。立法極為周備。乃各該省歷任藩司。奉行日久。

視為具文。並不依限報部。以致積累愈多。概歸懸宕。即如江安等省未經報銷各款。自道光四年起。至同治三年八月。積壓將及千萬兩之多。虧帑長姦。莫此為甚。若不申明舊例。嚴定處分。何以挽積習而清弊竇。除同治三年八月以前舊款。前已加恩豁免外。著兩江總督漕運總督江蘇安徽各巡撫。嚴飭各該藩司。迅將豁免以後各款登記銀兩。查明有無報撥之項。即行造冊咨部。以憑覈辦。嗣後此款銀兩。如已解司。即列入季冊。按半年定限入撥查銷。未解司者。嚴飭催提入撥。不准久存屬庫。致滋流弊。如各該藩司

等仍敢任意延玩。遺漏造冊。即著該部查明嚴行叅處。○光緒十年奏准查例載。直省兵餉。該督撫於本年將下年四季及再下一年春季應支數目。豫行確估。造具清冊。彙同該省司庫銀兩。並額徵地丁額徵雜稅清冊各一本。於十月內咨部酌撥等語。部中近年辦理冬撥。遇庫無餘存省分。均係按照其冊報應行帶徵節年錢糧。及下年應徵錢糧款目指撥。今陝西巡撫奏稱該省錢糧尚多缺額。入不敷出。庫無存銀。無憑造冊請撥。懇將光緒十年冬撥暨十一年估餉各冊展

緩。實屬任意延宕。該司庫目前即無存銀。來年斷不能不徵田賦。應令該撫轉飭藩司。照例造具冬撥估餉清冊送部。以憑查覈估撥。如不候部撥。擅行動用錢糧。即由部臣指名嚴參。以重庫款。

奏報秋成。○乾隆元年議准。督撫奏報年歲收成分數。除隨時具摺奏報外。例將通省夏收秋收分數。分繕兩本具題。下部科查覈。據奉天題報。麥收分數於七月內。秋收分數於十月內。山東題報。麥收分數於七月內。秋收分數於九月

十一月內。江南安徽所屬題報夏收分數於六月內。秋收分數於十月內。浙江題報夏收分數於五月內。秋收分數於十一月內。甘肅所屬題報夏收分數於八月內。秋收分數於十月內。陝西所屬題報夏收分數於六月內。秋收分數於十月內。直隸題報夏收分數於六月內。秋收分數於九月。十月內。福建題報夏收分數於五月內。秋收分數於八月。九月內。○三年議准。湖廣收成分數。向來早稻彙報於六月。晚稻彙報於八月。第地有冷暖之分。種有遲早之異。嗣後題



報秋成分數。總期確實。不必拘定從前限期。○  
七年議准。嗣後湖南題報二麥收成。毋庸合計  
全省分數彙奏。其實有種植頗多之處。確查實  
數。於早稻收成本內附列題報。至各屬月報時  
估米糧摺內。遇市有外販麥豆。仍照價登報。至  
此月市無二麥。准令刪除。○八年議准。廣東廣  
西夏收分數。於七月杪彙題。秋收分數。於十一  
月杪彙題。江南江蘇所屬。夏收分數。於七月內  
題報。秋收分數。於十一月內題報。江西山西夏  
收分數。於八月內題報。秋收分數。於十一月內

題報雲南夏收分數。於六月題報。秋收分數。於十一月內題報。○九年議准。四川幅員遼闊。嗣後收成分數。夏收。於六月杪彙題。秋收。於十月杪彙題。河南麥收分數。於六月內彙題。秋收分數。於九月內彙題。貴州夏收分數。於六月內具題。秋收分數。於十月內具題。○四十七年議准。烏魯木齊鎮迪道所屬地方。田禾播種齊全。及得雨滋長情形。收成分數等案。令烏魯木齊都統確查具奏。○嘉慶二年

諭嗣後各省督撫每年按例題報收成分數之本。惟就

本年情形簡明敘列。以便一目了然。毋得牽敘例案。致滋繁冗。○五年

諭。向來各省田禾夏收秋收分數。多有先奏約收。復於一二月後題報實收者。在各該督撫臚章入告。自應覈實報聞。即先報約收分數。後適遇旱澇偏災。收成稍減。原可隨時具奏。乃外省習氣。因州縣離省遠近不一。每遇府司覈轉遲延。於正在揚花吐穗間。即率行約略開報。其所報分數。已不足為憑。此後偶有晴雨不時。所收實數。未必能如約收之數。該州縣以具報在前。心存粉飾。即聞有災荒。亦以諱匿為曉事。而

府司等又輒迴護前詳。卽州縣偶有具報者。亦多方駁飭。惟期與原報相符。以致成災之處。不加勘辦。且照常催徵。置災黎於不問。朕於各省奏報災侵之時。加恩賑濟。惟恐一夫失所。從不許地方官有諱災之事。節經諄諄訓誡。但恐各省督撫仍有未能深喻朕意者。著再行飭諭各省。於奏報約收分數時。卽須據實開報。如具報後。續因旱澇蟲傷。以致收成不能悉照原數者。該督撫卽當據實續行入告。斷不可因奏報約收在先。稍存諱飾。

賦役全書○順治三年。

特遣大臣詣部。查覈在京各衙門錢糧款項原額。及現在收支銷算數目。在外直省錢糧。現在熟田應徵起存數目。其在內責成各該管衙門。在外責成撫按詳考。擬定賦役全書。逐條分析刊刻。進呈。

御覽。頒行天下。○九年覆准。令督撫各飭所屬州縣。每歲終。造荒田有無開墾。戶口有無加增。訂入全書報部。分別勸懲。○又題准。各省全書。責令布政使司刊造。某項係明末加增應去。某項係原額應存。每州縣各發二本。一存戶房。備有司查

考。一存學宮。俾士民檢閱。○十一年覆准。賦役全書。開載州縣田土戶口賦役。有關

國計民生。由部會同戶科酌定。務期永遠遵行。○十四年題准。訂正全書。如地丁先開原額。繼開荒亡。地丁既清。次開實徵。又次開起存。如起運則分別部寺倉口。存留則詳載款項細數。九釐銀。原係明時額徵。舊書未載。今應補入。宗祿銀。昔入存留。今改起運。漕白二糧。確稽舊額。運丁行月。遵議均平。視甲益甲。昔解本色。今均改折。南糧本折。昔留南用。今抵軍需。官員經費。定有

新規會議裁冗。改歸正項。本色絹布顏料銀硃  
銅錫茶蠟等項。已經改折者。照督撫題定價值  
開列。仍解本色者。照書載價值。如數辦解。務令  
綱目畢張。總散相符。後有續增地丁。督撫歲終  
彙題。聽部查覈。○又覆准。督撫以開墾田地。招  
徠人民。具題續入全書者。將花名畝數。備細造  
報。○康熙二年題准。全書造完日。分送部科及  
各掌道御史。通行磨對。頒發州縣。○二十四年  
議准。賦役全書。頭緒繁多。易於混淆。今新修簡  
明賦役全書。止載起運存留漕項。河工等切要

款目。刪去絲秒以下尾數。可除吏胥飛灑苛駁之弊。各州縣遵照新編全書。造徵糧比簿。不必別行造冊。○二十七年。新編全書告成。進呈。奉旨著發與各巡撫。率同經管錢糧司道官詳查細閱。有無應行更正增刪。務期永遠可行。明白確議。毋得彼此瞻顧。俟具題到日。再議具奏。欽此。遵

旨議定。舊賦役全書。遵行年久。每年增減地丁銀米數目。皆有各年奏銷冊籍可稽。新編全書。停其頒發。○雍正十二年奏准。直省賦役全書。悉以雍正十二年為準。凡額徵地丁錢糧商牙課稅內。



應支官役俸工。驛站料價。以及應解本折絹布顏料銀硃銅錫茶蠟等項。各分析原額新增開除實在並司府州縣衛所總散數目。詳細考覈纂輯成書送部。其校對刊刻所需工價。均於存公銀內動支。事竣覈實報銷。○又奏准直省一應額徵錢糧。並支解各項。每歲皆有收除。嗣後每至十年。照例動用存公銀修輯一次。○乾隆三十年奏准。賦役全書。開載額徵正雜錢糧。及應支俸工料價等項。其不經名目。不一而足。最明白簡便者。莫如奏銷一冊。前列山地田蕩版

荒新墾。次列三門九則額徵本折地丁起解留  
支。一經開冊。瞭如指掌。此書大指。即其張本。嗣  
後刊刻全書。均以奏銷所開條款為式。每逢應  
修之年。止將十年內新墾新坍各總數。添註於  
下。其餘不經名目。一概刪除。○道光十四年覆  
准。直省賦役全書。由布政司刊造。各以奏銷冊  
現開條款為式。毋得沿載不經名目。每十年修  
輯一次。至修輯之年。各廳州縣衛。俟次年奏銷  
辦竣起限。至十二月底止。陸續造送該管道府  
直隸州彙齊。限六箇月送司。布政司酌量抽換。

刊刷送部。如有造送遲延，均照例分別議處。○  
咸豐七年議准：浙江省應纂賦役全書，十年一  
纂，將升冊裁減，勻扣攤缺，逐一纂入，由縣呈府。  
如有遲延，照造報各項錢糧文冊遲延例議處。  
其各府纂造府總，應以最遲之縣申送到府之  
日起，扣限六箇月彙轉。如有遲延，亦照前例議  
處。